



wantok

NESENEL

Niuspepa bilong ol Papua Niugini stret

amba 245

Bilong wik i stat long Sarere, 18 Novemba 1978

Prais 10t

MI KAM LUKIM GAVMAN




Published by Wantok Publications, P.O. Box 1982, Boroko. Phone: 25.2214. - Printed by Wirui Press, Wewak.
Registered at the General Post Office, Port Moresby, for transmission by post as a Qualified Publication.



Sir Tei Abal
*Minista bilong bosim Pos na Teligrap na ielek-
trik pawa.*



Mista Pundia Kange
Minista bilong Bikbus



Mista Gai Duwabane
Minista bilong Difens

MOA NUPELA MINISTA

Mista Wesley Embahe
Minista bilong bosim redio na nius.



Mista Roy Evara
Minista bilong Praimeri Industri.



National weekly in
Melanesian Pidgin.

Editorial Offices:
P.O. Box 1982
Boroko

Phone: 25.2214
25. 2552
Telex: NE 22213

Branch Offices:
Wewak
Phone: 86.2479

Wabag
P.O. Box 111
Phone: 57.1018

Advertising:
In P.N.G.
Penny Donald
Phone: 25.2214

In Australia:
Peter Halse Associates
King York House
32 York Street
Sydney (2000)
Phone: 29.7527
Telex: 21.409

Subscription Rate:
Annual: K8.00.



LIDA MAS TINGIM OL PIPEL

Taim Julius Chan, i no laik long we Praim Minista i mekim tingting bilong mekim senis las wik, gavman bilong yumi i paul.

Pasin bilong ol wanwok yumi save, i go olsem. I mas gat gut na klia tok save namel long ol. Sapos i no gat tok save, ating samting i mas rong.

Sapos i tru olsem Mista Julius Chan i tok, Michael Somare i no tok save gut long en, ating samting nogut i stap namel long tupela.

Sapos wanpela man i no tokautim gut tingting long narapela, ating em i gat kros o em i gat pret. Em i gat samting em i laik haitim long narapela. Pret i save mekim wanpela man i ken kontrol long narapela.

Sapos Michael Somare i laik haitim samting long Julius Chan, dispela i no gutpela sain. Taim yumi haitim trupela tingting long ol narapela, yumi statim rot i go long gavman nogut.

Ol bikman long ples i save kros tu. Tasol ol i save kam bung wantaim na tokautim kros. Tok sore. Bihain na stretim olgeta samting.

Dispela em i rot bilong gutpela saveman insait long ol asples bilong yumi.

Nau yumi ken tingting liklik long dispela rot long dispela taim. Tru, olsem, gavman nau yumi gat i bikpela moa, na i gat narakain we liklik. Tasol insait long yumi man i wankain tasol.

Ol liklik kros bilong yumi, yumi mas lusim. Liklik pret bilong yumi, yumi mas pinisim.

Tingting bilong kantri i mas go pas. Fridom bilong ol pipel long nau na bihaintaim i mas stap antap tru long ol arapela liklik tingting kros o pret.

Ol lida i makim pipel. Ol lida i makim tingting bilong pipel.

Gut taim bilong yumi, yumi givim pinis long han bilong ol lida.

Tingting gut ol lida. Tingim ol pikinini. Tingim ol mama. Tingim ol papa.

Kumalau Tawali



YUNAITET PATI NAU INSAIT LONG GAVMAN

Long namba wan de bilong palamen dispela taim, hetman bilong Pipels Progres Pati, em Mista Julius Chan, i bin sanap long ai bilong ol memba bilong palamen na tok save olsem: "Mi wantaim 17 poroman memba bilong Pipels Progres Pati mipela i laik lusim gavman nau. Mipela i no laik moa."

Mista Chan i tok olsem, olgeta bikman bilong pati bilong em i bin putim hevi long em long kam autim dispela tok. Em i tok, ol i les long pasin bilong Praim Minista i no save askim laik bilong PPP taim em i makim ol minista o taim em i mekim bikpela wok olsem. Long wik i go pinis Mista Somare i bin makim sampela nupela minista na senisim nabaut sampela bilong bipo. Na sampela dispela minista i bilong PPP na ol i sem na i pilim Mista Somare i bin daunim ol. Ol i tok, bipo tu i olsem tasol - Pangu i no save askim PPP, i no save mekim long em olsem long poroman tru. Olsem nau ol i laik pinis wantaim Pangu.

Mista Somare na Pangu i harim dispela tokaut bilong Mista Chan na ol i kalap nogut tru. Long wanem, sapos PPP i lusim gavman, bai gavman i pundaun, bai i no gat gavman. Em i bikos ol Pangu tasol ol i no inap ranim gavman. Bilong ranim gavman, wanpela pati i mas gat 55 memba (em i moa olsem wan hap bilong olgeta 109 memba long palamen). Pangu i gat 48 tasol. Olsem na PPP wantaim 18 memba bilong em i bin helpim Pangu. . . na tupela wantaim i gat inap namba inap long ranim gavman. Nau PPP i go pinis. Nau Pangu na Somare i mekim wanem samting? Kwiktai em i mas painim wanpela poroman i gat inap memba bilong wokim gavman gen.

Oposisen Lida, Mista Iambakey Okuk, i belgut long lukim dispela asua i painim ol Pangu na gavman. Wantu em i kirap na i tok long palamen olsem: Mista Somare, long laik bilong em yet. Nau i mas

pinistaim long Praim Minista. Tasol Mista Somare i tok: Mi praim minista yet inap long vot bilong palamen i pinisim mi.

Orait, long nait nau ol lida bilong Yunaitet Pati i kamap toktok wantaim Mista Somare. Ol i tok, ol i laik go insait kisim ples bilong PPP na poromanim Pangu Pati long ranim gavman. Mista Somare i belgut tru long dispela aida. Bipo Yunaitet Pati em i Oposisen Pati aninit long hetman bilong ol bilong bipo, em Sir Tei Abal. Orait, nau Mista Somare i pasim tok wantaim Yunaitet Pati na em i givim 5-pela wok minista long ol Yunaitet Pati memba. Dispela ol wok minista em i bin tekewe long PPP nau.

Lida bilong pati, Mista Rafael Doa, i kamap Minista Bilong Helt. Mista Roy Evara, namba tu lida, i kamap Minista Bilong Praimeri Industri - em bipo Mista Chan i bosim. Sir Tei Abal nau i kamap Minista Bilong Pablik Yutiliti - em i save bosim pos na teligrap na pawa na kain samting olsem. Tupela moa Yunaitet Pati memba i kamap minista: Mista Wesley Embahe (Minista Bilong Midia - em redio na nius), na Mista Pundia Kange (Minista Bilong Ol Bikbus).

Tupela Pangu memba tu i go antap: Mista Toni Ila i kamap Minista Bilong Leba na Industri. Mista Ebia Olewale i stap yet Minista Bilong Foren Afeas. . . na nau em i kisim ples bilong Julius Chan na kamap namba tu praim minista.

Long neks de ol nupela minista i kisim wok bilong ol. Na olsem, bihain long tupela de tasol, gavman i go het olsem bipo. Tasol nau i gat sampela nupela minista long en.

Long dispela nupela gavman sampela moa man bilong hailans i kamap minista, long wanem Yunaitet Pati em i gat planti hailans memba. Na Papua tu i ken hepi, long wanem nau namba tu praim minista em i bilong Papua. Na Gavana Jeneral tu i bilong Papua.

Oposisen nau i gat 4-pela strongpela bikpela pipel long en na yumi mas wet pastaim long lukim: ol inap wok gut wantaim o nogat. Na husat bai lida bilong ol? Okuk o Chan o Guise o Abaijah?

Wanpela PPP memba bilong Nu Ailan, Mista Noel Levi, i bin mosen long palamen long em i laik kirapim wanpela vot egens long Michael Somare long palamen. Dispela kain mosen i mas wet wanpela wik bipo ol i ken bringim long palamen. Las taim Hailans Yunaitet Fran aninit long Mista Okuk i bin bringim wanpela vot olsem egens long Somare. Tasol Somare i winim ol; em i kisim 68 vot; ol i kisim 35 tasol. Dispela taim tupela sait wantaim i tok ol i gat 60 vot. Tasol samting i no stret. Wanpela i no tok tru, long wanem i gat 109 memba insait long palamen, na i no 120.

Dispela em i namba wan taim bihain long independens gavman i bin senis, na PPP i no moa stap long gavman. Tasol i luk olsem Mista Somare i strong yet olsem lida bilong gavman.



KAUNSIL KAIKAI MANI

Dia Edita - Mi gat bikpela wari tru long Waghi Kaunsil insait long Westen Hailans Provins. Wari bilong mi i go olsem. Mipela pipel long MidWaghi Kaunsil i save peim bikpela mani tru long taim bilong takis. Mipela man i save peim K16 na ol meri i save peim K12 na i no stret.

Long sampela hap bilong PNG ol kaunsil i save kisim liklik mani long ol pipel bilong ol. Tasol Waghi Kaunsil i no sori tru long ol pipel bilong em. Na planti yia ol i bin emkim olsem. Tasol mi no lukim wanpela samting i kirap long Minj, Banz, Kudjip, Nondugi.

Ol kaunsil i save kisim bikpela mani na ol i save baim ol kopi plantesin tasol. Na ol i no save wokim o stretim rot o wokim nupela haus sik o plis stesin i kamap gut. Nogat tru.

Sampela mani em ol kaunsil yet i save kaikai tu. Na taim yu ranim ka bilong yu insait long MidWaghi eria, bai yu lukim rot i bagarap olgeta na taia save pans klostu, klostu.

Mi askim yupela ol memba bilong Waghi Kaunsil, yupela i save kaikai mani tru, i no tingting long kirapim wanpela samting long ol ples na mi bin tok long en. Yupela save baim plantesin tasol oltaim na dispela plantesin em yupela yet i save ranim na ol memba long en na i no ol ol kanaka bisnis manmeri o manmeri nating i sea holda.

Long takis ol save kisim em ol liklik meri, liklik susu tasol, i save kamap em ol save peim takis na ol boi em ol i stat long i gat mausgras em tu ol i save peim. Ating krismas bilong meri em 14 na boi em 16 ol i save peim takis na i no stret. Sapos ol i no peim em ol kaunsil i save putim mipela long kalabus na ol lain bilong mipela i peim. Orait mipela i save kam ausait, mi wanpela boi i gat 15½ krismas tasol. Mi save peim takis na i no stret.

Ol Waghi Kaunsil ol yet i save tok long oigeta hap bilong PNG mipela Waghi Kaunsil tasol i gat planti mani tru. Em ol maniman long mani tasol i no long ol arapela samting. Olsem na ol kaunsil tu i save kisim bikpela fotnait olsem man i gat save na wok. Ol wan wan kaunsil i save kisimK20 na K30 kina na i no stret long lo bilong Lokal Gavman Kaunsil.

Em tasol bikpela wari bilong mi. Yu husat i laik bekim o skruim pas bilong mi. Em i orait tasol. Yu wanpela kaunsil i ritim, orait, bringim dispela hap pepa i go long neks miting long Kerowill Kaunsil Semba. Em tasol. Tenkyu.

Ond Ku,
Banz/W.H.P.

NO KEN BAIM BLUT

Dia Edita - Mi laik bai yu givim liklik spes long mi laik tok save long pas long Septemba Independens pepa, hettok "GIVIM BLUT". No gat nem tasol adres Kingsford Viba Ave, Wewak.

Dispela man i tok olsem "Gavman i wokim haus sik long helpim ol pipel bilong PNG na bilong wanem i wok olsem tretstua. Taim ol man i gat sik em bai ol i mas baim marasin.

Olsem, orait, taim Ret Kros i singaut long blut ol i mas baim pastaim long husat i laik givim blut. Bikos husat i sot long blut bai baim gen long haus sik".

Dispela pas husat i raitim i no gat gutpela save long Ret Kros na Gavman dipatmen.

Namba tu samting i gat lo long salim o baim blut - 1965 PNG gavman i pasim dispela odinens. Health dipatmen na Ret Kros i no wanpela bodi. Ret Kros i voluntia bodi na em i wok namel long ol helti manmeri na sik pipel. Blut em i kisim long ol gutpela pipel i fri olsem ol sikman i kisim fri.

Nau yu ken lukim pe bi-

kisim long ol gutpela pipel i fri olsem ol sikman i kisim fri.

Nau yu ken lukim pe bilong ol haus sik i go antap tasol i no gat wanpela man i peim blut yet. Bikos ol gutpela pipel i givim blut fri long Ret Kros long helpim ol sik pipel.

Las samting long PNG i gat lo olsem i no gat man i ken baim o salim blut. Husat i brukim dispela lo bai baim kot long K200 o go long kalabus inap long 6-pela mun.

Dr. T. Talonu,
Ret Kros/Boroko.

Salim ol pas
i kam long:

WANTOK
BOX 1982
BOROKO

RAIS BILONG YUMI YET

Dia Edita - Mi laikim yupela putim dispela belhevi bilong mi long Wantok Niuspepa. Hia em belhevi bilong mi. Long Morobe Provins na long arapela provins tu ol fama ol i save hatwok na planim na kamapim gutpela rais.

Tasol taim ol i putim long masin bilong rausim skin bilong en. Rais i bruk i go liklik liklik na i kamap olsem wesan na das. Olsem na planti PNG manmeri ol i no save laikim long baim dispela kain rais. Na ol i save baim tasol rais bilong arapela kantri. Olsem nau long dispela taim PNG Gavman bilong yumi i save lusim bikpela mani long arapela kantri. Olsem inap long gavman bilong yumi i lukluk long dispela kain hevi na stretim?

Mi save sapos gavman i no lukluk long dispela kain hevi bai ol man i no baim rais bilong ol Rais Fama, na ol fama i lusim dispela kain wok. Bai olsem, olgeta taim bai yumi i stap tasol long hatwok bilong arapela kantri tasol?

Long liklik taim moa PNG populesen bai i

kamap moa. Na yu gavman bilong mi long fidim ol manmeri. Olsem na long dispela taim yet inap long yu lukluk long dispela hevi bilong rais bilong yumi yet na helpim ol dispela rais fama long planim moa rais.

Em tasol wari bilong mi.
Botingnuc Bongon,
Logaweng/Morobe

SIOS WOKA

Dia Edita - Mi laik tok olsem wanem yumi katolik manmeri i ken bringim ol pipel long God na bringim God long ol pipel. Olgeta katolik manmeri maski long wanem hap yu sindaun wanem wok bilong yu. Yu gat bikpela wok moa long bringim God long ol pipel long laip bilong yu na pasin bilong yumi.

Long Not Solomons long hap bilong Buka i gat wanpela grup mipela kolim Buka Sios Wokas Asosiesen. Dispela grup em i gat bikpela laik long traim dispela tok long bringim pipel long God. Insait long dispela grup i gat ova 90 memba. Sampela ol ol man i tisa bipo tu. Wanpela dokta em i pinis i kam nau tasol long haus sik long Sohano. Taim em i no pinis yet em i save kam long ol bung bilong ol sios wokas.

Sampela ol Pater, Sister, na ol Pastoral wokas na i gat ol narapela wantaim ol kain kain wok olsem ol driava. Ol lapun manmeri na yangpela manmeri tu ol i stap. Ol memba save bung long in sevis ritrit na miting. Ol dispela memba ol i redi long mekim pastrol wok, skulim ol papamama long skul bilong marit na baptais, skulim ol dispela ol i no kisim sakramen bilong konpesio na konfirmasio. Ol i lida long lotu, visitim ol lapun tu wantaim ol yangpela, go pas long singsing, harim wari bilong ol pipel. Ol memba ol i amamas tasol long husat i gat laik long kamap sios woka. Em tasol.

Kuskus bilong Buka Sios Wokas Asosiesen
Sister Mary Antonia, CSN
Cayan Parish/N.S.P.

SEMIM DAIMAN

Dia Edita - Mi laik bai yupela raitim dispela stori i go daun long Wantok Nius na olgeta manmeri bilong PNG i ken ritim na lukim na tingim. Long gavman bilong yumi i wok olsem wanem long dispela taim nau.

Long 28 de bilong mun Septemba long 10.25 klok long moning. Na long MAF Boram ples balus, ka bilong haus sik i kisim wanpela bodi bilong man o meri (mi no klia) dispela dai bodi bilong Is o Wes Sepik. Na mi kirap na ting wanpela enimel o wanpela samting bilong wok ol i kisim i kam bilong salim i go. Long wanem ol i karamapim em long plastik na tu ol i no karamapim bodi bilong em gut. Tu ol i kisim i kam na tromoim nating long haus balus na i no gat wasman tu long en.

Na tu dipatmen bilong Helt i no bin tokim gut MAF, long balus wanem taim bai kisim bodi i go long ples bilong em. Olsem na em i stap 2½ (tu na hap aua) long haus balus. Na mi go pinis na mi no save wanem taim ol i kisim bodi bilong man i go long ples bilong em.

Ol wantok, mi laik tok olsem, Helt Dipatmen, maski long karamapim bodi bilong man olsem ol enimal. Gavman i mas lukluk gut long dispela samting na putim bodi i go long bokis. Plastik i bilong pik na dok, i no bilong manmeri.

Dispela samting i no mi tasol lukim long ai bilong mi. Nogat. I bin i gat ol liklik grup soldia tu i bin lukim. I no mi tasol.

Em tasol wari bilong mi. Husat i sapatim o i egensim, orait, rait tasol i go long Wantok na bai mi ken lukim. Tenkyu.

Bom Kange,
Moem/Wewak.

Michael Somare

(Prais Minista)

Sapos ol memba bilong palamen i ting, wok bilong statim ol provinsal gavman i bringim planti tumas long kantri, orait, em i samting bilong ol long senisim Konstitusen. Provinsal gavman i hangamap long Konstitusen tasol.

Pita Lus

(Minista bilong Bisnis)

Mi laik senisim pasin bilong beng long givim dinau long ol lokal pipel. Inap nau wan wan man bilong PNG i ken dinau inap long K10,000 tasol. Na ol grup o lain pipel i ken kisim dinau inap long K50,000 kina tasol.

Mi laik senisim dispela bai wan wan man i ken kisim dinau inap long K50,000 na ol grup o lain pipel i ken kisim inap K10,000 kina. Olsem bai ol inap tru long statim bisnis bilong ol.

Mi gat tingting bilong mi yet long dispela pasin bilong ol ausaitman i bosim ol stretstua. Ol sampela memba i bin askim mi long rausim ol man ya bai ol lokal pipel i ken kisim dispela bisnis. Mi inap mekim, tasol mi wet, mi tingting yet.

John Kaputin

(Minista bilong Nesenel Plening)

Em i samting bilong Prais Minista bilong nakim wanem ol minista em i laik. Konstitusen i ok olsem.

Na mi laik tokim memba, Mista Ibne Kor, em i tru sapos em i tok Mista Yano Belo long nupela wok minista bilong em, i olsem em i klinim su bi-bilong wanpela man long ang bilong em. Mi yet mi wok long helpim Prais Minista long wok bilong

em - na mi no klinim su bilong em, long tang bilong mi. Em i kranksi tingting.

Julius Chan

Mi laikim ol i mas wokim nupela gavman bilong dispela kantri kwiktaim tru. (Em i tok olsem bihain long em i bin teke-we Pipels Progres Pati bilong em long gavman).

Mista Tom Unwin

(Yuniatet Nesens Ofisa)

Tupela man bilong Wes Irian, bipo ol i kalapim mak na i kam insait long PNG, nau aut long kalabus na tupela i gat 3 mun long painim narapela kantri i laik kisim ol, o tupela i ken go bek long asples bilong ol long Wes Irian. Tupela man ya i Darius Maury na Amos Andey.

Long mun Ogas yet tupela i pinisim kalabus na tupela i stap long Oksapmin nau. Yuniatet Nesens i gat wanpela spesel wok na opis bilong helpim ol tarangu olsem i bin raus long asples na kantri bilong ol, bai ol i ken painim ples bilong sindaun gen. Mista Unwin, em i bosim dispela opis long PNG.

Tude i gat 38 pasindia manmeri bilong Wes Irian wet long Oksapmin Kem. Sapos ol i laik, ol i ken go bek long Wes Irian. Tasol yumi no ken rausim ol.

Dispela dipatmen bilong Yuniatet Nesens i helpim ol man olsem long painim narapela kantri i laik kisim ol.

Paul Songo

(Namba tu seketeri bilong Edukesen)

Sampela pipel i tok olsem: planti yangpela boi i save kamap rasko na mekim olkain pasin nogut na brukim lo bikos ol i aut long skul taim ol i yangpela tru na i no gat wok long ol.

Tasol dispela em i no tru. Ol raskol i no yangpela tumas. Ol i ol boi i winim 16 yia pinis. Tude ol plisman i ken soim yu olsem: long yia 1976/77 insait long PNG ol i bin painim i gat 586 yangpela boi aninit long 16 yia i bin kalapim lo. Tasol i gat 49,798 boi antap long 16 yia i brukim ol panis.

Klostu olgeta boi na meri i save lusim skul taim ol i gat 12 o 13 krismas. Tasol ol pasin raskol na pasin bilong brukim lo i stap long ol yangpela pipel i winim 16 yia pinis.

Ol yangpela pipel aninit long 16 yia, ol i 48% bi-

long olgeta pipel bilong kantri. (Em i min long olgeta 100 pipel, 48 i aninit long 16 yia). Tasol dispela grup (48%) i aninit long 16 yia, i 1% tasol bilong ol manmeri i brukim lo.

Em i soim olsem, ol yangpela manki i lusim skul, ol i no save kamap raskol wantu. Nogat. Bihain long sampela yia tasol, ol i save kirapim pasin nogut.

Iambakey Okuk

(Lida bilong Oposisen)

Sapos pati bilong mi i (i go moa long pes 16)

kisim gavman na pawa bilong kantri, mi laik pinism dispela aidia long mipela i kisim helpim nating long Australia. Maski long presen long planti mani olgeta yia. Mi laikim mobeta ol i given saveman bilong skulim na helpim mipela, na ol i putim mani insait long bisnis bilong dispela kantri, na i no putim long gavman tasol. Mi mekim dispela tok, bikos wanpela bikpela man long gavman bilong Australia i bin tok olsem: Australia i mas daunim bikpela dinau em i save givim long PNG, na givim moa helpim ol arapela kantri nabaut.

Long de namba 14 bilong Novemba Prins Charles bai gat 30 krismas. Em i luk olsem nau na em i no marit yet. Dispela poto i kam long British Information Services.




AVELING-BARFORD PACIFIC

for your compaction requirements.

Vibratory Plates
 Vibratory Rammers
 Pedestrian Vibratory Rollers
 (Double drum hydrostatic drive)

Agents for bearings and hose fittings Ryco-flex Nachi



AVELING-BARFORD PACIFIC PTY. LTD

Head office: Ume Street, Gordons, Port Moresby. Port Moresby.

PO Box 6457. Phone 257166 Telex NE22206

Lae depot: Morobe Avenue, PO Box 1191, Lae Phone 424188 Telex NE42411



THE INVESTMENT CORPORATION OF PAPUA NEW GUINEA



SAPOS YU SMAT, YU BAIM SEA LONG INVESMEN
 KOPORESEN BILONG PAPUA NIUGINI

Bai yu kisim winmani bilong planti kampani wantaim.

Sapos yu laik save moa, o yu laik kisim fri wampela kala buk i soim wok
 bilong mipela, yu rait long: Investment Corporation
 P.O. Box 155
 Port Moresby


Nem bilong yu:

Adres bilong yu:

*Wampela opisa bilong Invesmen Koporesen i kaunim bikpela hip mani
 wampela papa bilong tretstua long bus i bin bringim bilong baim 1500 sea
 long Invesmen Koporesen.*



Pinat na taro long kokonas gris



Ol samting yu mas i gat:

- 6-pela taro
- sampela pinat
- 1-pela dria kokonas

Rot bilong wokim:

1. Yu ken baim pinat i bin kuk pinis o yu ken yusim pinat i kam long gaden bilong yu. Sapos yu nupela pinat, rausim skin bilong pinat na kukim isi isi long prapan antap long paia.
2. Rausim retpela skin na putim pinat i go namel long klinpela laplap. Kisim ston na brukim pinat i go liklik.
3. Rausim skin bilong taro.
4. Skrapim kokonas na wokim gris bilong em.
5. Kukim taro long gris bilong kokonas. Taim klostu i kuk pinis, putim pinat wantaim taro na larim i stap.


Yu ken kukim pinat wantaim rais long gris bilong kokonas.

Ol dispela stori bilong kukim gutpela kaikai i kam long wanpela gutpela buk ol i kolim Buk Bilong Kukim Gutpela Kaikai. Yu ken kisim nating. Yu rait tasol i go long:

The Nutrition Section,
Department of Health,
P.O. Box 2084,
Konedobu.



SINGER



**PREN
BILONG YU
INAP OLTAIM**

© Singer Company



Strong Tru.

HUSKY DYNA

Niupela trak bilong Toyota i save wok hat tru.
Yu k karim kago o pasindia – long biktaun
o r nogut long bus – dispela trak em inap.

TOYOTA

BRANCHES AT: PORT MORESBY 25 4088 LAE 42 2322 MT. HAGEN 52 1888

ELA MOTORS LIMITED

MADANG 82 2188

RABAU 92 1988

KIETA 95 6083

WEWAK 86 2255

GSP ET 013P

BAIM T SIOT BILONG FAMILI



Naispela T siot i gat tok MI LAIKIM YU, WANTOK o NEW NATION. . . .

Bilong ol pikinini: K2.75 (sais 24, 26, 28)

Bilong ol bikpela manmeri: K3.00 (sais 12, 14, 16, 18, 20, 22, 24, 26)

Mi laik odaim:

Wantok T siot.sais

New Nation T siot.sais

Nem bilong mi:

Adres bilong mi:

Hia mi putim sek inap long K. bilong baim ol dispela T siot.

(Yu mas putim 21 toea moa long baim pos opis bilong wan wan T siot yu odaim.)

Salim i kam long: Wantok, Box 1982, Boroko.



PES BILONG PIKININI



Ol pikinini i gat rait long go skul

Wanpela rait moa ol pikinini bilong olgeta kantri i mas gat, em i rait long go long skul fri. Na tu i mas gat lo long ol kantri, ol pikinini i MAS go long praimeri skul. Sapos ol i no go, papamama i mas kot.

Tasol sapos tude yu go raun long olgeta kantri, bai yu painim i gat moa pikinini i stap ausait long skul olsem insait. Na ol i ting bai i moa nogut yet long ol yia i laik kamap.

Long planti ples longwe long ol taun, long planti kantri, wanpela pikinini tasol bilong olgeta tenpela i save winim 4 yia long skul. Long planti kantri ol yangpela pikinini i stat long go long skul, tasol bihain long wan o tupela yia, ol i pinis. Long wanem ol i hangre, o ol i sik, o ol i mas goaut painim wok bilong winim wan siling bilong helpim ol yet na famili bilong ol.

Ol dispela kain pikinini kwiktaim tumas i lusim save long rit na rait na dispela i pasim rot bilong ol long go het kisim nupela save na aidia. Na tu sapos ol i no inap rit, ol i no inap lainim planti samting i ken helpim laip na sindaun na wok bilong ol.




Poto i soim sampela laki pikinini bilong PNG i stap long skul.

TOM PIPER MIT i klostu moa, i gutpela tru



Sapos yu laikim kaikai i swit moa na i redi hariap tru, baim wanpela tin Tom Piper mit. Sapos stua i klostu, Tom Piper tu i klostu.

OPIM NUPELA H



Poto antap i soim Mista Fraser i paitim kundu bilong opim nupela haus buk. Na long poto daunbilo Mista Somare i sutim tok save i go long garamut.

Namba wan haus buk o laibreri bilong PNG i op nau long Waigani, long Port Moresby, i no longwe long ol bikpela haus gavman. Dispela haus buk ol bikpela man bilong PNG na Australia i bin opim long Mande, 30 Oktoba.

Praim Minista Malcom Fraser bilong Australia, na praim minista bilong bipo, Mista Gough Whitlam, na Praim Minista Michael Somare i mekim wanpela seremoni bilong opim dispela Nesenel Laibreri. Mista Somare i bin paitim garamut bilong opim; na Mista Fraser i bin paitim liklik kundu.

Dispela laibreri em i presen bilong Australia bilong makim independens bilong PNG.

Dispela haus buk i kostim klostu K2 milion kina. Kos bilong wokim dispela haus em inap long K1,500,000; na Australia i givim ol buk inap long K100,000, na ol film inap long K300,000 na olkain desk na masin na bet samting bilong ol buk inap long K100,000.

Long nem bilong Australia, Mista Fraser i givim dispela presen long PNG. Australia tu i bin wokim ol disain na plen bilong dispela haus. Tasol wanpela kampani bilong PNG stret, em Barclay Brata, i bin wokim ol haus. Man i bosim dispela nesenel laibreri, em

Mista J
long Pr
Ame:
bikpela
long la
ol pipe
piksa t
insait l
long p
Aitape


Insai
putim
olgeta
sen i gc

Mista
kain lo
dispela
manme
ta buk
raitim
stori b
long ol

Austi
wanem
long er
dispela
nesenel
stap ol

Olgeta poto long dispela
tupela pes i kam long
Australian Information Service.

*Poto daunbilo i soim
haus buk, em i sanap to*



US BUK

Yocklunn, bipo em i seketeri bi-nista.

Englan na Japan i bin givim buk long dispela laibreri. Na i bai ol i gat kain kain so, bai kam ritim buk na lukim olkain ol i gat stori bilong wok prin J. Katolik Misin i gat masin big Tumleo Ailan klostu long i 1905. Sista Kerubina i bosim.

Wanpela laibreri i gat spes bilong 100 buk, na 10,000 film. Nau m bilong Opis bilong Infomepela hap.

Em na Mista Fraser tu i tok wanpela bikpela naispela haus buk: mas givim olkain save long ol i insait, em i mas bungim olge-PNG, na olgeta buk bai yumi PNG, na ol stori bilong ples, na ambuna. Dispela laibreri i op el na i fri.

bin askim PNG, em i laikim presen bilong independens bi-anti man i putim tingting long tok: mipela i laikim wanpela i. Olsem tasol na nau dispela i sen bilong Australia.

John Yocklunn, em hetman bilong bosim dispela nupela antaim Mista Fraser.



Wanpela lapun, Lasarus Sirote bilong Noten Provins, i givim wanpela spia bilas long Mista Somare olsem presen bilong nupela laibreri. Poto antap i soim Mista na Misis Fraser na Mista Somare i givim tok tenkyu long Australia long dispela nupela laibreri.



Maxell Helpim OI



Maxell bateri i stap long olgeta hap.
Taim yu go long stua yu mas askim long Maxell tasol.
Maxell i no inap pinis kwik. Em bai i stap longtaim tru
...Maxell

Kisim Maxell bateri tasol



GSHM03

LAPUN LUKIM TAUN

Inap long sampela taim nau planti pipel nabaut long Port Moresby na long hap daunbilo long nambis klostu long Konedobu, ol i bin lukim wanpela lapun i gat naispela waitpela gras tru i limlimbur nabaut. Na planti taim em i stap skilim ol lain bilong sing-sing.

Dispela man (poto bilong em i stap long ausait bilong dispela nius-pepa) em i Mista Stanley Tago bilong Noten Provins. Em i gat 64 krismas na em i papa bilong wanpela minista bilong gavman, em Mista Stephen Tago.

Mama i harim Stanley long yia 1913. Taim em i gat 7-pela krismas yet em i bin go sindaun i stap long Engliken misin stesin bilong Manau long Noten Provins. Em i skul inap long 3-pela yia, orait, em i go bek long ples na i wok long Ambogo Suga plantesin - em ples ya, Hikutura Wok Welpam i stap nau. Orait bihain gen em i go bek long asples Siai. Tude Koridata Distrik Minin i stap long dispela ples; ol Engliken i bin kamap hia long yia 1932.

Long dispela taim i gat planti pait namel long ol pipel bilong ples. Stanley yet i lukim tupela man i pait na i dai; tupela i kros long wanpela meri.



Taim em i yangpela yet, Stanley i kamap Kristen. Wanpela man, nem bilong em Sirote, i bin skulim em long Baibel na ol tok bilong God. Bihain Stanley yet i raun na tokim ol stori bilong Baibel long ol pipel na i kamap olsem katekis. Bihain em i marit na i gat tupela pikinini: wanpela meri na wanpela man. Man ya em i Stephen tasol, nau em i Minista bilong Hom Afeas.

Stanley i kisim baptais tasol bihain long woa. Em i namba wan Kristen long

hap bilong em i bin kisim baptais. Em i bin wok sampela yia long Gona Hetstesin na pikinini Stephen yet i go skul long Gona.

Stephen Tago nau i wok long raitim wanpela buk i stori long papa bilong em. Em bai givim dispela nem long buk bilong em: "Man i kamap 30 yia bipotaim tumas."

WANTOK

Ol mak yu lukim antap long dispela stori, ol i min nem bilong mipela: "Wantok". Wanpela aipasman i bin raitim long spesel taiprait bilong em. Daunbilo yu ken lukim em i sindaun long haus bilong em na em i raitim. Ol aipas i save rit long pinga bilong ol. Dispela taiprait i wokim ol liklik maunten long pepa. Olgeta wan wan leta olsem a,b,c, i gat kain kain mak bilong en, na olsem ol aipas i save rit. I gat planti buk ol i bin wokim olsem, bai ol aipas tu i ken rit. Long PNG i no gat planti aipasmanmeri olsem long sampela arapela kantri. Nau long Port Moresby ol i laik wokim wanpela klap bilong ol aipas.

Long Port Moresby wanpela man i ranim ol wok telipon long bikpela haus palamen, i gat planti lain i kam insait na i gat planti telipon bilong ol ofis. . . dispela man em i wanpela aipasman. Nem bilong em Paul Sangio na em i pikinini bilong wanpela memba bilong Palamen bilong Pomio long Is Nu Briten. em Mista Koriarn Urikit.



TAMBU TORO


TORO NANTAIM JACK FLEMIN,
EM WANPELA PAIA MAN.



SAPOS BALUS O KAR BUS I PAIA LONG PLES BALUS, PAIAMAN TASOL I KILIM PAIA INDAI.....



.... NA TAIM TAIM OL HAUS I PAIA, MIPELA TASOL INAP STAPIM PAIA.



Tumas spot long skul?

Mista Alkan Tololo, seketeri bilong edukesen, i bin autim wanpela wari. Em i ting, sampela studen long ol sampela haikul na koles i lusim planti skul tumas long wanem ol i mas go longwe long skul bikos ol i memba bilong sampela bikpela tim bilong spot, na ol i save pilai long ol longwe ples.

Edukesen dipatmen i wokim nau sampela rul i karamapim ol studen i save go long trening kem bilong spot na i save insait long sampela bikpela pilai o spot i stap longwe long skul bilong ol. Nau ol i mas kisim pastaim tok orait long papamama bilong ol na long Mista Tololo yet - bipo ol i ken lusim skul.

Mobeta ol bikpela klap bilong ranim spot i putim ol de bilong pilai na resis long taim ol skul i gat holide.

Mista Tololo i tok, em i eksampel bilong wanpela hetmasta bilong skul, i bin givim tok orait long wanpela studen long skul bilong em long stap insait long ol bikpela spot na pilai. Na dispela studen i bin lusim 13 wik skul insait long wanpela yia.


Mista Tololo i ting, dispela kain pasin i no stret, na dispela kain studen i no inap long skul gut.

FANTA
TRADE MARK REGD
IT'S A BOTTLE OF FUN



FANTA IS A REGISTERED TRADEMARK OF THE COCA-COLA COMPANY.

HRME 015 6366



Poto antap i soim Mista Pita Piaoen, wanpela rural divelopmen ofisa bilong Enga Provins, nau tasol em i bin kam bek long wanpela bikpela kibung ol yangpela pipel bilong Esia. Dispela kibung ol i bin mekim long 22 inap 29 Oktoba long biktaun Semarang long ailan Java long Indonesia.

I gat 240 deliget i bin kam long dispela kibung. Ol i bilong ol kantri Bangladesh, Fiji, HongKong, Indonesia, Japan, Korea, Malaysia, Nepal, Pakistan, Papua Niugini, Filipin Ailans, Singapore, na Sri Lanka. Em ol lain kantri bilong Esia.

Ol i bin toktok na autim wari bilong ol long ol yut o yangpela pipel. Ol i ting long namba wan ples long helpim ol yangpela pipel i stap ausait long ol taun na ol i laik helpim laip na sindaun bilong ol. Namba wan samting ol i laikim bai Yunaitet Nesens i makim yia 1980 olsem yia bilong yut o yangpela pipel. Olsem em i makin pinis yia 1979 i yia bilong ol pikinini.

Dispela grup deliget i laik skulim ol yangpela pipel long ol i mas taitim bun na bung wok wantaim long mekim go het ol viles na jam grup. Na ol i no ken ranawe i go long ol biktaun.

Mista Piaoen em i gutpela eksampel bilong dispela kain wok. Long wanem em i lusim bikpela skul long Goroka na tu sampela wok olsem kamda tisa long Moresby long go bek long asples bilong em long wara Ambum long arere bilong Wabag na em i bin bungim wanpela grup yangpela man na i statim Laken Fama Asosiesen.

Mista Piaoen i holim wanpela felosip bilong Viles Ekonomik Divelopmen Fan long PNG.

Pastaim ol i wok nating; no gat pe bilong ol. Nau ol i gat mani long beng aninit long nem bilong Laken Fama Asosiesen. Garman tu i bin helpim ol. Ol i save groim kaikai bilong maket na groim kakaruk. Ol i save helpim tu ol pipel nabaut long ol; ol i bin wokim wanpela rot i kalapim bikpela maunten namel long ol na Wabag. Na ol i no wokim long masin; long han tasol.

Mista Piaoen i holim wanpela felosip bilong Viles Ikonmik Divelopmen Fan long PNG.

STORI BILONG TUMBUNA

MERI BILONG SKAI

Bipo tru wanpela man i stap. Na wanpela taim em i go long bus. Em i go stap long bus na draipela ren i pundaun. Na em i sanap long as bilong wanpela diwai. Na draipela win wan-taim na klaut i pas.

Na em i sanap i stap. Na em i harim sampela samting i flai anap long het bilong diwai. Na em i lukluk i go antap na em i lukluk im planti yangpela meri bilong skai. Na em i hait i stap na em i lukluk gut long ol. Na ol yangpela meri i kam daun long graun na ol i kisim sampela yelopela graun long tok ples ol i kolim (Ambu). Na sampela meri i kisim graun na ol i go bek long skai.

Na las tru wanpela naispela meri i kam daun na em i kisim graun i stap. Na man ya em i holimpasim dispela naispela yangpela meri bilong skai. Na meri i tanim long ol samting i gat

nil na em i holim pas yet na meri i tanim olsem snek na man i holim pas yet. Meri i mekim olsem i go, i go les. Na meri i tok: "Sapos yu man bilong bus, yu lusim mi. Na yu man bilong ples, orait yumi go long ples bilong yu."

Na man i kisim meri i go long ples bilong em. Na meri i tok, sapos ol i mekim singsing long sampela hap yu no ken i go. Na man i tok mi no inap i go. Na rabisman ya meri i mekim em i kamap naispela yangpela man. Na tupela i stap.


Na long haus bilong tupela i pulap long kain kain samting. Long wanpela rum i pulap long kina na narapela rum i pulap long mani. Na tupela i stap. Wanpela taim man i tok em i laik go long ples we ol i singsing. Na meri i bilasim man gut tru. Na em i tok yu go. Bai mi stap long haus.

Na man i go pinis long singsing na meri i go long ples bilong em long skai. Singsing i pinis na man i go bek long haus. Na em i painim meri bilong em i no stap. Na man i save long promis bilong meri long i no ken i go singsing.

Na em i wokim longpela lata i go long skai. Na klostu i laik holim skai na em i tudak na em i go bek. Long nait meri i brukim lata i go daun long graun. Na moningtaim man i lukim lata i bruk i stap long graun. Na em i bel hat. Na em i ranawe long bus na i tanim kamap bus man.

Em tasol stori tumbuna.

Yawe Pu
Tindua Com. School
Kerapali
P.O. Pangia



TULTUL TITAN



Sapos yupela i laik odaim ol TITAN waia o autim sampela wari o laikim bai mi bekim sampela askim bilong yupela, raitim pas i kam long dispela adres,

Titan (NG) Ltd.
P.O. Box 25,
LAE.
Morobe Province.
Tel. 42.3988
42.3497

ATING BAI MI
RAITIM PAS
LONG
TULTUL
TITAN

ARC-TITAN Pty. Ltd. P.O. Box 1026, LAE. Tel. 42.3988.

(i kam long pes 5)

Pasifik Pipel Fran

Dispela grup pipel bilong PNG i bin askim ol man i makim kantri Frans long PNG long hariampim liklik pasin bilong givim independens long ol teritori bilong ol long dispela hap bilong biksolwara Pasifik . . . Ol i ting long Nu Kaledonia, Nu Hebrides. Sosaiti Ailan, na Tahiti.

Ol grup i wok long kisim independens long dispela tripela ailan i bin askim ol brata long PNG long helpim ol, na putim hevi long kantri Frans.

Pasifik Pipels Fran i bin raitim dispela kain tok long ol Frans: Ol tumbuna bilong yupela Frans yet i bin kirapim dispela aidia bilong fridom na pasin brata. Ol yet i bin autim strong tru dispela bilip

long olgeta manmeri i wankain.

Olsem na mipela i laik askim yupela ol Frans long bihainim ol dispela tingting yet long olgeta teritori yupela i bosim yet long biksolwara Pasifik. Mipela i bilip ol pipel bilong ol dispela ailan na teritori, ol yet inap long ranim kantri bilong ol. Ol i bikpela pinis.

Na mipela tu i no laik Frans i tromoim ol bikpela atom bom long wara bilong mipela. Yupela i save tok, em i no save bagarapim laip bilong ol man long dispela hap. Sapos em i tru, watpo ol i no troim ol dispela bom long kantri bilong ol yet? Watpo ol i kam mekim hia na bagarapim helt bilong mipela?

Yupela ol Frans i bin go pas long tok na aidia bilong fridom. . . Orait, mipela i laik yupela nau i bihainim dispela sem tingting bilong Yunaitet Nesens.

Sir Tore Lokoloko

Yupela i no mas ting olsem: bai provinsal gavman i kamap na i stretim olgeta wari bilong yupela. Nogat. Em no tru.

Provinsal gavman i ken wok gut sapos ol pipel i helpim em na i sapotim em.

Yupela hia long dispela provins bilong Madang i bin yusim gut ol mani gavman i bin givim long rural developmen bilong dispela hap. Na yupela i bin mekim olsem olgeta wok yupela i promis long mekim. Kas bilong yupela. Provinsal gavman i ken go het gut sapos yupela i mekim gutpela wok olsem.

Mi harim pinis yupela i gat wanpela kopi faktori pinis long dispela provins na wanpela bikpela bisnis bilong groim kakaruk.

Roy Evara

(Minista bilong Praimer Industri)

Long ol stua ausait long ol taun ol prais bilong baim olkain samting i kain kain tumas. Na i no gat wanpela dipatmen bilong gavman i helpim ol manmeri i mas tromoim mani long baim ol samting.

Dispela wok bilong bosim prais bilong ol samting em i wanpela samting gavman i mas strong long mekim. Tasol em i no taitim bun bilong dispela wok.

Wanpela as bilong dispela trabel em i bikos planti bikpela bakstua i save baim planti ol samting na salim gen long ol stretstua bilong liklik bisnisman. Ol dispela bikpela bakstua i stap long han bilong ol ausaitman bilong ol ausait kantri. Ol yet i gat bikpela strong long makim ol prais. Planti stretstua tumas i stap long

han bilong ol dispela bikpela kampani yet.

Gavman i mas helpim lokal bisnisman i go insait long dispela kain bakstua bisnis. Ating bai em inap daunim ol prais planti na em bai helpim ol stretstua na ol pipel i save baim olkain samting long ol.

Dirona Abe

Yumi bin painim sampe-la kampani i laik statim wok rais inap long karamapim 50 hekta graun long hap bilong Bereina. Dispela em i kain rais i save gro long wara. Na olsem ol i mas wokim wanpela raunwara na banisim nabaut.

Ol lokal pipel nau i orait long larim ol i yusim inap long 2000 hekta graun.


Na long hap bilong Cape Rodney long Sentral Provins yumi laik kirapim bek bikpela wok raba o gumi.

BOROKO MOTORS

SAPOS YU GAT WOK-TINGIM FORD



Tractors
Equipment



Yu ken lukim nupela FORD TRAKTA long BOROKO MOTORS long olgeta hap bilong Papua Niugini. Na tu yu ken baim long Arawa Motors, na Sepik Engineers, na long Kimbe Bay Shipping, na Highlands Heneni Goroka, na Higatura Motors Popondetta.



OL MEKENIK BILONG
MIPELA INAP FIKSIM
FORD
LONG OLGETA HAP

Mipela i gat planti spea pat na mekenik.

WOK RAIS LONG YIA 1910

Wanpela ripot bilong Amerika i tok olsem, Papua Niugini i winim olgeta arapela nupela kantri long rais wan wan sitisen bilong kantri i kaikai. Ol i tok PNG i baim 27 kilo rais long olgeta wan wan manmeri long kantri.

Biktaun Hong Kong, Singapore tasol i winim PNG, tasol dispela tupela ples i siti na i no gat gaden olgeta na olsem ol i mas baim planti rais long ol ausait kantri. Tasol PNG i gat planti planti graun, na watpo em i mas baim planti rais olsem?

Olgeta yia PNG i baim moa na moa rais. Long yia 1977 em i baim 81,000 tan rais. Na long yia 1979 ol gavman i ting bai PNG i baim 100,000 tan rias. Na dispela bai kostim samting olsem K33,000,000 (33 milion kina).

Olsem tasol na Minista bilong Praimeri Industri bipo, em Mista Julius Chan, i bin strong long kirapim wok rais long Mekeo long Papua na long Bainyik long Is Sepik.

Ol pipel i laikim rais bikos em i kaikai inap long strongim bodi na i no kos planti.

Long dispela stori mipela i printim tu sampela poto bilong yia 1910. Planti nupela na yangpela ausaitman i kam long dispela kantri na i ting ol i bin mekim wanpela bikpela samting: ol yet i bin statim pasin bilong groim rais long PNG. Katolik Misin long Aitape i bin mekim pinis longtaim bipo; na ol i bin mekim tu long Danip klostu long Madang.

Em hia sampela tok i kam long wanpela pas wanpela misineri i bin raitim i go long ples long yia 1910. Em i tok olsem. "Inap long tupela yia nau Misin i bin groim kain rais i save kamap long wara. I luk olsem nau dispela pasin bilong groim rais i go gut. Mipela i bin mekim bikpela wok try bilong statim.


Mipela i lukim pinis olsem wanem ol lokal wokman bilong mipela kwiktam tumas i laik kaikai rais na i les long kaikai bilong gaden bilong ol. Olsem pasin bilong groim rais i ken helpim dispela kantri moa yet. Tasol mipela i no ken hariap tumas, mipela mas go het isi isi bai mipela inap long stretim ol wok rais.

Mipela i pilim olsem: bihain ol studen long skul na ol wokboi i save pinis long pasin bilong groim rais na i bringim dispela save na pasin i go bek long ples, bai dispela kantri inap long kamap independen long kaikai, na i no mas baim sampela long ol ausait kantri."


Em nau. Dispela i no tok bilong 1978; em i tok bilong 1910 yet.

Minista bilong Foren Afeas, Minsta Ebia Olewale, i bin tok olsem: PNG i bin kontrak wantaim Australia long yia 1974 yet long baim olgeta rais long Australia. . . tasol em i ken baim 10,000 tan long sampela arapela kantri.

Help Dipatmen bilong PNG i strong long dispela samting: olgeta rais i mas gat spesel vitamin long en. Na dispela samting i no ken kam long ol arapela kantri. Na i tru, yumi inap baim rais long sampela arapela kantri tu, tasol ol i no inap kontrak long salim rais inap planti yia, na tu prais bilong ol i antap liklik.



Poto antap i soim ol boi long yia 1909 i wokim baret bilong bringim wara long wok rais long Danip klostu long Madang. Poto daunbilo i soim liklik tais ol i bin wokim bilong groim rais.



Poto daunbilo i soim rais i bin kamap pinis long Danip/Alexishafen long yia 1910.





MASKI WISIL NA STAPIM TRAK

Dia Edita - Mi save lukim planti man ol i wok long stapim ka bilong ol kampani, taim draiva i draivim ka i go long wok bilong em.

Mi lukim ol pasindia i wok long stopim ka bilong ol kampani. Yu stapim wantok bilong yu na bos bilong em i kam bihain bai yu mekim wanem? Bos bilong em i rausim em, bai yu painim wok bilong em?

Sapos yu pasim wantok draiva bilong yu na yutupela i go long wanem hap na ka i kapsait na kilim yu i dai, tasol i no gat pe long dispela. Ol wokman bilong kampani, em yes, i gat pe long dispela.

Yu mas tingting gut na yu mas stopim P.M.V. ka. Yu no ken wisil taim draiva i ran. No gat 4-pela ai long lukim yu.

Sori ol lain wantok brata na tambu, maski long stopim ol ka bilong kampani.

Husat i lukim na i no stret long tingting bilong mi, rait tasol long nius bilong yumi Wantok.

Petrus Ambai Wane,
Laiagam Bush/Enga

AWI NA EMTI BOTOL

Dia Edita - Em i namba wan taim bilong mi long rait i kam long Wantok Niuspepa plis. Tumas.

Wari bilong mi em i go olsem mi bilong Awi tasol mi wok i stap long BCL hia long Panguna. Na mi i gat bikpela amamas tumas long lukim sampela lain manmeri ol i save raun

olgeta taim long ol taun i gat stua long en. Na ol i lukim sapos wanpela man i dring pinis na i stromoi emti botol i go long rabis dram, em ol i save kisim na bungim bilong kisim mani. dring pinis na i tromoi emti botol i go long rabis dram, em ol i save kisim na bungim bilong kisim mani. Taim ol man bilong baim ol botol i kam, orait ol i save kisim bikpela mani long dispela taim.

Em i no long hia tasol. Nogat. Long olgeta hap long PNG tu. Na em i save helpim mipela tru long dring.

Tasol wanpela taim mi bin harim rabis tok bilong ol lain wantok bilong mi em ol Awi tasol. Mi i no save tru long pes bilong ol tasol i luk olsem ol Awi tasol. Ol i bin tok olsem: Nogat sem bilong ol long kisim rabis botol long ai bilong planti manmeri na long pablik ples.

Brata, yu no ken tok nogut long dring bilong dispela. Em i nambawan dring bilong yumi PNG. Tasol mi lukim em i namba wan wok ol bratasusa i mekim long helpim yumi.

Tasol yu man bilong sutim tok long ol bratasusa i lukim. Yu no ken tok nogut long dring bilong yu yet na bilong mipela tu.

Kukupa Lyabiboto,
Panguna/Not Solomons

KUNG FU I GAT HEVI

Dia Edita - Mi wanpela man husat i save laikim tumas long lukim ol Kungfu piksa. Mi no lukim yet wanpela Kungfu pait long ai bilong mi yet olsem na taim ol i bringim Kungfu

i kam na ol i laik lainim ol yangpela man na meri insait long Wewak taun. long pes taim mi amamas long dispela tingting bilong ol.

Tasol mi gat bikpela wari tru long we ol i kisim ol nupela man na meri husat i laik lainim Kungfu. Mi ting i mobeta ol tisa bilong Kungfu i mas traim na lukluk gut long wanem kain man o meri i gutpela long ai bilong lo na olgeta gutpela sitisen bilong dispela kantri na bihain ol i ken tisim ol long Kungfu pait o selp difens.

Nau mi lukim ol i kisim olkain man olsem ol raskal na ol man bilong mekim trabel na mi bel hevi tumas na mi wari tumas. Olsem bihain taim bai ol dispela lain nogut bai long amamas bilong ol tasol, bai ol i yusim ol save bilong ol long Kungfu long statim trabel namel long ol plis bilong yumi na ol stretpela manmeri bilong dispela taun.

Husat inap save long tingting bilong wan wan bilong ol? God tasol inap save. So plis tru ol tisa na pren traim na lukluk na tingting gut long taim bilong kisim nupela ol sumatin long dispela selp difens ol i kolim Kungfu pait.

Em tasol na sapos yu husat i gat sampela toktok long dispela pas bilong mi. Plis rait tasol i go long Wantok Niuspepa na bai mi na olgeta i ken ritim. Tenkyu.

Francis Ati Lee,
Wewak.

MASKI YU BILONG WE

Dia Edita - Mi laik bekim pas bilong Yarokon Aipinimad long Arawa, Not Solomons. O yes brata, yu tok tru long ol emploimen opisa em i no long Bougainville tasol. Long olgeta stesin o taun bilong Papua Niugini ol i save mekim dispela kain pasin na em dispela kain pasin i no stret.

Long kantri bilong yumi ol husat i askim dispela

kain rabis kwesten long ol man em i no stret tru na yupela emploimen opisa long olgeta kampani. Yupela i harim gut wanpela man i go askim yupela na yupela i givim kwesten em i kam long wanem hap. Na i askim yu long wok na yu bilong wanem hap?

Yu bilong Papua Niugini tasol o yu no kam long narapela kantri na yupela ol man na meri yupela emploimen opisa long kampani yupela harim gut na i no ken givim kwesten long ol man i go askim yupela long wok. Orait em tasol liklik wari bilong mi i pinis. Na Husat i bel kros tumas, orait, traim na salim pas i go long Wantok na mi ken amamas long ritim. Tenkyu.

Leo Manaa,
Kerehu/Port Moresby.

MAKET TUDIA

Dia Edita - Man mi plis long askim Wantok Niuspepa. Yu larim liklik spes long mi bilong ples Boromil viles. Na lukluk bilong mi i go olsem. Long ol manmeri ol i putim maket long salim kaukau na banana na suka na ol samting bilong kisim mani.

Mi lukim tasol ol i putim 3-pela kaukau long 10 toea. Na olgeta samting pe i go antap tru. Na manmeri ol i laik i go baim tasol ol i putim dia tumas. Na mi tingting olsem ol samting bilong tumbuna em i tru long yumi. Na yumi kisim na kaikai.

Tasol mani i kam we long wanem hap tru? Mipela husat i wok long gavman o kampani. Em i hat long wok mani. Na ol kaikai em i no hat tumas long yumi kisim long gaden bilong yumi. Na mani ples ol i wokim yumi no save.

Maski dia long salim kaikai long maket ples. Tasol wanpela samting long yangpela boi na yangpela meri. Ol pilai kas na pilai satu long pablik rot o long maket. Em i no gutpela pasin we yumi wokim long ai bilong ol pipel. Em yu mi stilim mani bilong narapela wantok.

Yumi mas sindaun na tingting long kirapim bisnis long ples bilong yumi, bipo yumi laikim kaikai bilong tumbuna. Tasol nau yumi laik holim mani na yumi laik baim samting bilong waitman na bilas long skin.

Em mi laik wantok Niuspepa i mas bekim wari bilong mi.

Kaman Mol,
Gumine/Simbu

HUSAT RAITIM LO?

Dia Edita - Hia nau mi laik autim wanpela liklik wari long yu.

Dispela wari bilong mi i go olsem. Planti taim mi save harim Viles Kot tasol mi no amamas long dispela kot. Long wanem mi no amamas long dispela kot. Mi save olsem ol pipel i no kisim bel isi long dispela kot.

Taim ol saveman i laik raitim lo buk, yupela save raitim olsem wanem? Taim liklik trabel i kamap ol pipel i laik baim kot yupela makim olsem K40 na K60 na K100 olsem o nogat? Dispela em i olsem pik i bagarapim gaden na stilim liklik samting, na tok nogut na lap long narapela, na waswas long riva.

Mi pilim olsem liklik trabel i kamap na yupela i raitim long lo buk. Kain pe olsem mipela i bagarap tru. Mi save olsem stat bilong dispela i bin kamap long Pangia na wanpela man i bin indai pinis long dispela kot. Dispela man i bin mekim liklik rong na em i pret long dispela kot na em i hangamap long rop na em i dai pinis.

Mi pilim olsem gavman i mas skulim gut ol dispela lain man i save harim Viles kot long Pangia sab provins. Mi save olsem tu ol man i no save klia gut long we bilong kot.

Mobeta gavman i mas salim sampela saveman i kam long Pangia na skulim ol dispela lain man i save harim kot long en.

Em tasol liklik wari bilong mi.

BAIM WANTOK

Sapos yu laik kisim Wantok niuspepa olgeta wik inap long wan yia stret, yu salim nem na adres bilong yu wantaim K8.00 i kam long:

WANTOK BOX 1982 BOROKO

Long go long Australia em i K14.00.

Long Yurop na Amerika: K18.20 (long sip)

K24.00 (long balus)

OL TESTAMEN STORI

SOL I KIRAP NOGUT NA I PRET LONG OL SAMTING I KAMAP LONG EM, NA I KIRAP I GO BEK LONG PLES BILONG EN. TAIM EM I WOKABAUT YET SPIRIT BILONG GOD I KAM LONG EM. EM I GO KAMAP LONG PLES, TASOL EM I NO TOKSAVE LONG WANPELA MAN LONG GOD I BIN MAKIM EM I KAMAP KING.

TAIM SAMYUEL I SINGAUTIM OL PIPEL I GO BUNG LONG MISPE, SOL I GO WANIAM. NA SAMYUEL I AUTIM WANPELA TOK NA OLGETA MANMERI I KIRAP NOGUT TRU.



GOD I MAKIM SOL KING BILONG YUPELA.

EM I STAP WE?

Wanpela Samting I Traim King

1 Samyuel

9:20 - 11:7

HAP NAMBA TU:

Stori i tok save long Sol, bai em i kamap king.

KWIKTAIM OL I GO PAINIM SOL. TASOL SOL I HAIT PINIS, LONG WANEM, EM I PRET LONG KAMAP KING. OL I PAINIM PAINIM I GO NA BIHAIN OL I KISIM EM.

OL PIPEL LONG MISPE I AMAMAS LONG SOL, TASOL TAIM EM I GO LONG PLES, SAMPELA I KROS LIKLIK LONG EM.



OL I BRINGIM SOL I KAM NA OLGETA PIPEL I SINGAUT STRONG, "SOL I KEN I STAP LAIP LONGTAIM!"



LUKIM, KING BILONG YUMI I GO BEK LONG OL BULMAKAU. EM I GUTPELA KING A?

BAI EM I HELPIM YUMI OLSEM WANEM?

Used by permission of the David C. Cook Foundation. Copyright 1973, David C. Cook Publishing Co. All rights reserved.

WANTOK SPOT PES

Long dispela pes i gat sampela bikpela soka tim bilong PNG. Ating yu inap painim wantok o wanples bilong yu long ol dispela poto?

Poto long raithan i soim tim bilong yunivesiti bilong PNG yet.

Poto daunbilo i soim Germania Futbol Klap tim. Em i stap long Port Moresby.

Daunbilo olgeta long dispela pes, em i Mopi Futbol Klap bilong Lae.



**PAINIM
WANTOK
BILONG
YU**

